

中國方志叢書·華北地方·第三三〇號

據

清·高蔚霞修苟廷誠纂
清·光緒十九年刊本

影印

甘肅省

通渭縣新志

(二)

成文出版社有限公司印行

中華民國五十九年二月臺一版

通渭縣新志

全二冊

發行人：**黃成助**

出版者：**成文出版社有限公司**
台北郵政信箱二二六〇五號

台北郵政信箱二二六〇五號
台北市羅斯福路三段279之二號
電話：三七〇一三二號

印刷者：**東南印製廠有限公司**
和平西路二段70巷83弄29號

內政部登記證內版台業字第一一四七號

重修通渭縣新志卷之十一

人物

通邑山環水繞人物代出其間功業昭垂踐履篤實者
載在邑乘按籍可詳至於忠孝節烈尤正氣之所結關
乎風教卽逸隱方技各成品格亦有不畧者志人物

第十一

節舊志

仕宦

漢

秦嘉字士會博學宏詞辟上郡掾人爭賀嘉不悅曰趨

走風塵非志所願其直節義氣顯見於議論間任未久旋以疾卒於官今什川鎮秦家坪卽其故里

明

段克己少時家貧不能自給日繕書以代耕厯日夜寒暑誦聲朗朗不息或譏之曰子憊甚何不事生理而自苦若是愕然曰此卽吾生理也非讀書明理何以生爲宣德乙酉舉於鄉任登州教授尋遷山西道御史差竣復命又授山東道御史所在政皆稱最子鉞孫世隆皆以明經繼世今寺子川卽其故里

王瓚字宗器號中林其母夢日墮懷中而生瓚及長博學能文長於詩賦成化甲午舉於鄉辛丑成進士授工部虞衡司主事進員外郎奉敕修渠宦中貴劉瑾恥與員外同事瓚上疏欲正國體不報瑾執奏誣瓚不遜遂下獄尋赦進郎中奉敕修興王府瓚明立約束不逸奸不勞癡事竣王三錫金幣皆稽首固辭上疏言督工部不可更易更易則人玩人玩則事弛詔從之定遠侯以征勦功調都指揮英英輒往瓚劾譴之而湖湘諸有司咸奉法焉在安陸五年役不告而事集及還安陸民爲

立生祠尋遷懷慶知府丁憂歸起復補開封知府附近
藩省政事煩劇瓚約僚屬諭以節用愛民爲要務政大
治開封民歌曰包公後王開府嚴如父慈如母不可犯
良可慕復以憂歸遂卒於家瓚性孝友待弟瑜友愛備
至內外無閒言著有中林集八景詩

李鏊良玉子弘治乙酉舉於鄉癸丑登進士任行人司
封藩所至謝絕常儀馳聲洋溢德範純雅才學精優生
平忠義自矢操修罔懈未展所志而卒鄉人爲之歎息
白我心字醒龍號能菴別號逃塵老人萬曆癸丑拔貢

學富才長事繼母孝遇貧窮多賙卹學使徐移檄加獎
以爲博學能文惜數奇屢薦不第後授四川龍安府經
厯未幾告歸兀坐書齋以詩文自怡年至八旬猶著作
不倦邑舊志其手筆也時人稱白夫子著有且畱草戒
言過文等書

張東陽號清泉萬厯二年貢生博覽經史任四川南部
縣主簿性剛介不阿因與時宰論政不合拂袖而歸終
老林泉琴書自怡嘗訓諸孫曰學問須是知行並進方
爲有益彼王陽明專以致知爲主只緣他是上知一流

人若汝輩根器庸鈍纔曉得些道理便須實體諸躬方不負此一點靈明聞者歎服年逾九十而卒

趙榮縣北悠江鋪人正德初以明經授中書舍人會睿帝北狩廷臣議使者榮毅然請往遂擢大理寺少卿兩使王廷氣度威嚴言論勁直有足動北人敬畏者迨迎復乘輿景帝器重之遷太常寺正卿未幾擢工部左侍郎睿帝復辟論功欲大封榮榮固辭會吏部尙書李賢持論不合只擢工部尙書五年閹宦曹吉祥與姪昭武伯欽糾集私黨謀不軌臣民逃匿榮獨奮然以討賊爲

己任招募壯士諭以順逆大義從者數百人鼓譟而進擒吉祥等斬之上聞之曰是真忠臣也方委朝政於榮而榮遽卒上歎息曰趙尙書不竟其用是國之不幸也遣使致奠錄其子珙爲錦衣衛指揮僉事

國朝

張翼儒字渠若乾隆壬申科解元廉隅持躬行文妙極自然每一作出老宿莫能移易少從李南暉遊及南暉任威遠縣翼儒代纂威遠志主講青峯書院諸生莫不欽服晚任富平縣司訓因縣令貪污劾罷其職翼儒亦

拂然歸將行富平士庶具饌儀皆不受祖餞數十里流涕而別

張景元貢生字殿魁工詠諧磊落不羈有狂士風焉嘗與友人聯詩李南暉服其敏捷張翼儒賞其豪華任皋蘭訓導時司道各憲無不稱其才學故一時名播省垣惜未能竟其素裕僅以司訓老於官

李南暉字仲晦青峯其號又號西海雲樵生康熙四十八年十二月二十八日初就傅聰明過人磨一大硯鄉先生戲與出對曰硯大文章大卽應聲曰心寬天地寬

家甚貧嘗於下學後研磨待一餐而志氣昂昂從不向人作乞憐狀王先生希旦深器之旣入庠博涉羣書與同輩言志輒在孔廟兩廡間雍正十二年初歲試卽冠軍旋登拔萃時嚴冬單布袍而已學使延請襄閱試卷次年舉鄉試第七名計偕北上六薦禮闈不售歷主本省秦州河南桐柏陝西中部等書院講席所至稱鉅公詩字畱題信口隨手多可傳者南暉潛心易理嘗讀繫辭至言行樞機章惕然曰謹言慎行殆學易之實際乎又至圓神方智章復惕然曰齋戒洗心殆學易之秘要

乎在秦州時畫太極河圖等象於壁間而玩之一夕夢
古帝王召見狀貌衣冠若世所傳人祖者賜食物次早
觀圖頓有所悟自是體驗益密神明默成者三十餘年
著讀易觀象以爲六十四卦三百八十四爻與三聖所
繫之辭無一語不自河圖出者蓋從來儒者未發之旨
乾隆三十年部銓四川威遠縣知縣政事之暇卽以觀
象玩辭爲務而修城修志以及橋梁河堤書院諸工作
百廢俱興民心愛戴歡若一家呼所修萬年橋爲李公
橋青峯書院者於威遠翔鳳書院之外別創一處而自

捐膏火者也一時桃李稱盛後又嵌手書所著慎思錄
及諸詩石刻百餘塊於壁邑人至今珍護搨印獲資以
備歲修焉斷獄若神嘗有審石頭之名又決華陽大獄
無屍無犯占大衍得屍於鄒知府墳坎中信乎奇矣金
川之役督糧於丹東及化林坪等處得保薦浩然有尊
盧之思於是作憇雲集四十四年引疾歸田士民乞留
不允將爲生祀以奉南暉謝而慰之曰吾當再至俟西
南城角有紅燈則吾來汝邑也回籍後重訂周易獨坐
一室雖家人不得輒入四十九年春忽曰吾邑將有大

難乃泥其稿於壁未幾逆回爲變公助守與令約死城上旣而令託故去南暉曰此非吾所矣歸坐家祠呼次子思沆姪師沆侍左右僕三兒亦持煙火侍城旣陷俱以罵賊死惟三兒獲蘇則盤臂火繩灼膚矣厯言其被害狀聞者感泣時五月十二日也十六日夜威遠縣西南城角有火光邑人謂李公紅燈至也無何殉難之耗至南暉在任時作伏羲廟於城西南隅別構一亭爲退食著易之所其去也邑人卽以亭爲李公祠至是迎神入祠春秋無廢賊旣平福文襄公至通渭上其狀於朝

奉

旨以知府禮賜葬祭加贈太僕寺卿入昭忠祠

旋復奉

旨祀鄉賢命史館立傳子姪亦與旌又蔭

一子蓋聖恩有加無已云初公之少也嘗有所激獻對
於南門關廟云匹馬可獨行仗此生凌霄浩氣會風虎
雲龍別自有千年事業雙眉常不展憫當時滿目羣雄
同石牛腐鼠那堪登一部春秋其後註易動援龍比蘇
卿關壯繆岳忠武等以證爻義蓋其忠義出於天成而
不自覺其流露也所著諸書皆行世惟易象圖說緒論
十卷讀易觀象惺惺錄二十二卷於光緒九年冬十一

月十二日咨國史館核辦十八年九月初三日奉文允
准立傳

南炎曾字念詒曰畿子少英特與同閭遊昂昂若野鶴
之立鷄羣乾隆戊子領鄉薦己丑大挑一等歷任廣東
新甯知縣貴州永甯知州由軍功賞戴花翎升廣西南
甯知府所至頌聲載道未竟其用而卒著有承詒詩鈔
牛樹梅字雪樵號省齋作麟長子少有大志九歲忍饑
苦讀題左傳書背曰太公釣於渭水之濱伊尹耕於有
莘之野彼皆然矣吾何爲獨不然十三歲作春聯云今

日魚龍相雜他年鷄鳳各殊識者已謂其氣宇不凡年
十七入邑庠卽負笈游學自食餼及拔萃率以爲常博
覽性理諸書發爲文章粹然儒者之言嘗六赴鄉試六
上春官道光辛卯舉於鄉辛丑成進士分發四川卽用
知縣補彰明厯任隆昌雅安資州甯遠茂州皆以德化
民每出一票必計程刻期踰則懲之謂幕友曰吾通籍
時壽陽相國告余曰汝甘有俞陶泉汝知之乎其爲官
有六字真言曰勤聽斷少科派汝其識之余奉以從政
斤斤恐負師訓也每日案牘必清結有未清者夜以繼